

ՀՏԴ 81՝37

Լեզվաբանություն

Շուշան ՆԵՐՍԵՍՅԱՆ

Վանաձորի պետական համալսարան

«Հայոց լեզու և գրականություն» մասնագիտություն, մագիստրատուրա 1-րդ կուրս

Գիտ. դեկավար՝ Բ. Գ. Թ., դոցենտ Լ. Պետրոսյան

ՀԱՅՐ ՀԱՄԿԱՅՈՒՅԹԻ ԻՄԱՍՏԱՅԻՆ ԸՆԿԱԼՈՒՄՆԵՐԸ ՀԱՅԵՐԵՆՈՒՄ

Սույն հոդվածում քննել ենք ազգակցական հարաբերություն ցույց տվող հայր հասկացության իմաստային ընկալումները: Անդրադարձել ենք ոչ միայն հասկացության առաջնային, այլև մի շարք երկրորդական իմաստներին, որոնք, այնուամենայնիվ, սերտորեն կապված են առաջնային իմաստի հետ և բխում են նրա բովանդակությունից: Քննելով բառարանային վերլուծությունները՝ կատարել ենք համեմատական աշխատանք՝ պարզելով, թե իմաստային ինչ փոփոխություններ են գրանցվել բառի պատմական զարգացման ընթացքում:

Աշխատանքի ավարտին եկել ենք այն եզրակացության, որ հայոց լեզվի բնիկ շերտի բառերից մեկը՝ հայրը, ժամանակի ընթացքում սկսել է գործածվել ոչ միայն անձանիշ, այլև իրանիշ գոյականներին վերագրվելիս:

Բանալի բառեր՝ հայր, հասկացությ, բառ, առաջնային իմաստ, երկրորդական իմաստ, ծնող:

Մ.Որսեսյան

СЕМАНТИЧЕСКИЕ РЕЦЕПЦИИ КОНЦЕПТА «ОТЕЦ» В АРМЯНСКОМ ЯЗЫКЕ

В данной статье мы проанализировали семантическую рецепцию концепта «отец» в системе родственных отношений. Мы исследовали не только первичное значение концепта, но и ряд второстепенных смыслов, которые, тем не менее, тесно связаны с первичной семантикой и вытекают из ее содержания. На основе анализа словарных статей, мы провели также сравнительное исследование и выяснили, какие семантические трансформации были зафиксированы на всем протяжении исторического развития данного слова.

В конце работы мы пришли к выводу, что одна из исконных лексем армянского языка — «отец» — с течением времени стала употребляться не только с терминами, обозначающими лицо, но и с предметными существительными.

Ключевые слова: отец, концепт, первичное значение, вторичное значение, родитель.

Sh.Nersesyan

**SEMANTIC PERCEPTION OF THE CONCEPT “FATHER” IN
ARMENIAN LANGUAGE**

In this article we have considered the semantic perceptions of the concept “father” that shows relationship. We have touched upon not only the word’s primary meaning but also a number of secondary meanings which are closely related to the primary meaning and come from its contents. Having discussed lexicographical analyses we have done comparative analysis to find out what semantic changes have been recorded during the historical development of the word. At the end of the study we have come to the conclusion that the word “father”, as one of the words of the Armenian basic layer, has been recently used not only for animate nouns, but also for inanimate nouns.

Keywords. Father, concept, primary meaning, secondary meaning, parent.

Հայր հասկացության հիմնական իմաստն է «Այր կամ արու ծնող զավակի» (12, 32) : Այս բացատրությունը գրեթե նույնությամբ կրկնում են հետագա շրջանների բանասիրական բառարանների հեղինակները: Ս. Մալխասյանը «Հայերեն բացատրական բառարանում» որպես այս բառի առաջնային իմաստ նշում է. «արական սեռի անձ, որ որդի ունի, արու ծնող» (10, 39), Է. Աղայանը «Արդի բացատրական բառարանում»՝ «Տղամարդը իր որդիների համար, ծնող արական անձը» և «Տղամարդ, որ արդեն որդի ունի կամ ունեցել է» (1, 813): **Հայր** հասկացության առաջնային իմաստը գործածելի է հայերենի պատմական զարգացման բոլոր երեք շրջաններում և բարբառներում: Այն իր առաջնային իմաստով պահպանվել է հայ գրականության և ժողովրդական բանահյուսության մեջ:

Այսպես **հայր** հասկացության առաջնային իմաստը գործածված է «Աստվածաշնչի» «Գիրք ծննդոց» գլխում «Վասն այնորիկ թողցէ այր **զհայր** իւր՝ և զմայր իւր, և երթիցէ՝ զհետ կնոջ իւրոյ» նախադասության մեջ, որտեղ առաջնային իմաստի պարզաբանման համար հիմք զուգահեռ գործածվող, ազգակցական հարաբերություն արտահայտող բառերը՝ *զմայր, կնոջ*:

Հայ հին և միջնադարյան տարբեր հեղինակների ստեղագործություններում **հայր** հասկացության առաջնային իմաստը հստակորեն տարբերակելու համար հիմք են դառնում զուգահեռ գործածվող ազգակցական հարաբերություն արտահայտող այնպիսի բառեր, ինչպիսիք են՝ *մայր, պապ, եղբայր, քույր, որդի* և այլն: Օրինակ՝ *Բարբանջեալ բարձին Զիւելքն խիկարին, Ետուն սպանանել, զիւր մօրուն, Հօր աչքից հանին* (8, 159), *Պապուս անունն ասեն մօլլայ, Աղբօրս ասեն քաղքին շահնայ, Ու զիմ անունս ասեն Աշալ, Մէկալ քուրոջս Օղուդայ, Զիմ մօրս անունն ասեն Ֆաթմայ, Ու հօրս ասեն դատի մօլլայ* (8, 320), *Հայրն չկարաց փրկել զորդին իւր սիրական, Որդին էլաց և հառաչեաց յոգոց*

եհան (8, 343), *Ձիս այլ սիրո տէր արիր, ու հանիր իմ հորն ի տանէն, Աղուո՛ր, քեզ բան մի կ'ասես, հորդ ահուն չեմ իշխեր ասել* և այլն:

Աշխարհաբար գրականության մեջ **հայր** հասկացույթը դրսևորվում է իր առաջնային իմաստի կիրառմամբ: Աշխարհաբար մի շարք հեղինակների ստեղծագործություններում, հատկապես երբ դրանք ընտանեկան հարաբերություններ են պատկերում, հանդիպում ենք այս բառի առաջնային իմաստի կիրառմանը, ինչպես՝ -*Անցածը վերադարձնել չի կարելի, հա՛յր, օրհնի՛ր, -արտասանեց որդին մի տեսակ խուլ ձայնով* (14, 292), *Ու ողորմելի հայրը կիսոտանար, ամեն բան կիսոտանար, կանուխ պիտի գար ու պտտցնելու պիտի տաներ այս հեք զրկյալ որբերը* (14, 78), - *Կուզե՛ս ես քո քույրը լինեմ, դու իմ եղբայրը: Ես կիսնդրեմ հորս, որ դու մեր տանն ապրես և ինձ համար միշտ այդպիսի եղանակներ նվագես* (14, 147), *Շմալոնը հորը տեսնելով՝ ավելի մռայլվեց և մեղավորի պես, կարծես ինքը լիներ աղետի պատճառը, չպատասխանեց և աչքերը գետնին գցեց* (3, 4) և այլն:

Հայ նոր գրականության հատկապես չափածո ստեղծագործություններում նույնպես հանդիպում ենք **հայր** հասկացույթի առաջնային իմաստի կիրառություններին, ինչպես՝ **Հայրը** *ինչպես մռայլ մի ամպ, Աղջիկն անուշ մի լուսին* (5, 122), -*Սա էլ հորս տնկածն է, - պարծենում էր քույրս քաջ, Գոհար քույրս, որ հորս «դռչաղ» տղեն էր դարձել* (13, 180), *Մինչ հայրը նրա՝ Գևոն կոշկակար, Գոգնոցը հանեց, արխալուղ հագավ* (15, 4), *Գեթ հայրը մնար... Բայց հայրն էլ գնաց, Երբ որդին չկար տասը տարեկան* (15, 7) և այլն: Չափածո խոսքում **հայր** հասկացույթը շատ հաճախ օգտագործվում է փաղաքշական՝ **հայրիկ** տարբերակով՝ երբեմն ունենալով իմ դերանունով արտահայտված հասկացուցիչ, ինչպես՝ - **Հայր՛իկ**, ինչո՞ւ ետ չդարձան էն քաջերը սիրատենչ, Մի՞թե, **հայրիկ**, ինձ մոռացան, Էլ չեն բերի հուրն անշեջ (5, 124), **Հայրի՛կ, հայրի՛կ, մի՞թե չկա Էս աշխարհքում անշեջ հուր** (5, 125), *Գտնեմ դեռ կորած խաչքար մի, հայր իմ, Որպես շիրիմդ՝ համբուրեմ ու լամ* (13, 183), **Հայր իմ**, *արծիվ կուզեիր, բուերի փառքն ինձ մնաց* (13, 201), և այլն: Հ. Շիրազի ստեղծագործություններում նույնպես **հայր** հասկացույթը կապակցվում է այնպիսի որոշիչների, ինչպիսիք են **խեղճ, ծերուկ, սուրբ, քաղցր, հրաշք** և այլն, ինչպես՝ *Մանուկ աչքիս՝ հայրիկս ծերուկ հսկա էր թվում*, (13, 184), *Ու փշրեցին սուրբ հորս որպես կավե մի արձան* (13, 192), *Միայն քաղցր հայրիկիս նուրբ շշուկն է դեռ ինձ հետ* (13, 192), *Երբ հայրիկիս շնչին էր միշտ կարոտում որբ հոգիս, Հարցնում էի ծերերից՝ թե տեսե՞լ եք հորս խեղճ* (13, 194), *Հրաշք հայր էր, մարդ էր, մարդ և աստվածն էր բոստանի...* (13, 209) և այլն:

Հայր հասկացույթը հայերենի բարբառներում հանդես է գալիս հետևյալ տարբերակներով **հայր** (Ազլ.), **հար** (Ախց., Ակն., Ասլ., Կր., Ննխ., Պլ., Ռ., Սեբ., Սչ.), **հէր** (Ալշ., Գոր., Երև., Հմշ., Ղրբ. Մշ., Շմ., Տփ.), **խէր** (Մկ.,

Մրդ., Ջղ., Սլմ., Վն. Ոզմ.) որոնցում ակնհայտ է երկբարբառի պարզեցումը (*այ>ա, է, է*) (2, 32):

Հայերենի զարգացման բոլոր փուլերում *հայր* հասկացույթը, պահպանելով առաջնային իմաստը, ասիճանաբար ձեռք է բերում նոր երկրորդական իմաստներ և կապակցելիական նոր հնարավորություններ: *Հայր* հասկացույթի իմաստաբանական քննությունը ցույց է տալիս, որ այս հասկացույթը վերագրվում է *աստվածանիշ, անձնանիշ, կենդանանիշ* և *իրանիշ* գոյականների՝ իմաստային համապատասխան հերթագայություններով:

1. Աստվածանշություն

Դավանաբանական հայեցակետով դիտարկելիս հայ իրականության մեջ առանձնացնում ենք երկու շրջան՝ *նախաքրիստոնեական* (հեթանոսական) և *քրիստոնեական*:

Հեթանոսական շրջանում հայ դիցաբանության գերագույն աստվածն Արամազդն էր, որին հաճախ անվանում են աստվածների *հայր* կամ *հայր* Արամազդ, ինչպես՝ *Հայոց աստվածների հայր Արամազդի զլխավոր տաճար-սրբատեղին գտնվում էր Բարձր Հայք նահանգի Դարանաղի գավառի Անի ամրոցում: Լսիր, ա՛յ Եվայի ցեղի դասական ներկայացուցիչ, ինչու՞ ես կարծում, որ դու իսկական ծնող ես, իսկ հայր Արամազդը՝ պահեստային*:

Քրիստոնեական շրջանից մեզ հասած գրականությունից պարզ է դառնում, որ *հայր* հասկացույթը, ի տարբերություն ազգակցական հարաբերություն ցույց տվող մնացած հասկացությունների, ամենահաճախադեպն է կրոնաեկեղեցական գրականության մեջ, որտեղ նրա գործածումը վերագրվում է *Աստված* հասկացույթին՝ «*Հայր տեսոն մերոյ կմ հայրն ձեր երկնաւոր*» (12, 32) իմաստով, ինչպես՝ «*Ձայ ասի՝ հայելով յառաջին անձն յանուն հօր, և Որդւոյ, և Հոգւոյն սրբոյ: Առ հայր իմ (բնութեամբ), և առ հայր ձեր շնորհօք: Հայր տեսոն մերոյ Յիսուսի Քրիստոսի և այլն: Կամ Հայրն ձեր երկնաւոր: Տէր հայր մեր: Հայր մեր՝ որ յերկինս*»: Ս. Մալխասյանցը այս իմաստի պարզաբանման համար բերում է «*Աստված, իբրև արարիչ ամենքի*» (10, 39) բացատրությունը: Այս իմաստի դրսևորմանը հանդիպում ենք Ե. Կողբացու «Եղծ աղանդոցում», ինչպես՝ «*Եթե հայրն յորդւոյն արարածս ոչ խնայեաց այնու, զի ի ձեռս չարին մատնեաց, որդին զհրսն զի՞ արդ ոչ զընդայցէ. Առ տկարութեա՞ն ինչ, թե՞ առ չարականութեան*» (7, 465):

2. Անձնանշություն

Կապված կրոնաեկեղեցական իրականության հետ՝ այս հասկացույթը, աստվածանիշ, վերագրվում է նաև անձնանիշ գոյականների՝ լայն ընդգրկմամբ նշանակելով «*եկեղեցու հայրեր, հոգևոր կոչման անձեր կամ հեղինակներ, որոնց գրուածքները կմ որոշումները վայելում են հեղինակութիւն*» (10, 39):

Այս իմաստի նեղացմամբ ՆՀԲ-ն բերում է «Աբբայ, վանական, միայնակեաց և վարդապետ եկեղեցւոյ կամ հայրապետ» իմաստը: Այս իմաստով **հայր** հասկացույթը գործածվել է «Վարք հարանց և բանք նոցա լուսաւորեն զանձնն» երկի և միջնադարյան հեղինակների մի շարք երկերում: Այս իմաստով գործածվելիս հասկացույթը հիմնականում կապվում է արական սեռի որևէ անձնանիշ հատուկ գոյականի, ինչպես՝ «Ասաց **հայրն Անտոնն**», «Արսենիոս **հայրն**» և այլն: Այս իմաստին բնորոշ են նաև լուսաւորե, ժողովել, ասել գործողություն ցույց տվող բայերը և աստվածաբան, սուրբ, բազմերջանիկ որոշիչները, ինչպես՝ «վարք **հարանցն** և բանք նոցա լուսաւորեն զանձնն, Ասաց **հայրն** Գրիգոր աստուածաբան, սուրբ **հարքն** ի Նիկիա ժողովեալքն, բազմերջանիկ **հարանցն**» և այլն:

Սրանցից բացի, **հայր** հասկացույթը առհասարակ համարվում է «հարգական մակդիր հոգևորականների» (1, 813), մասնավորապես՝ **Տէր հայր**-քահանային դիմելու ձև, **Հայր սուրբ**-վարդապետին դիմելու ձև, **Սրբազան հայր**-եպիսկոպոսին ողջունելու ձև, **Վեհափառ հայր**-կաթողիկոսին դիմելու ձև (վերջինիս դեպքում հաճախադեպ է վեհափառ **հայր**ապետ արտահայտությունը), ինչպես՝ *Էն վանքում հայոց ազգին պահապան Աղոթք էր անում ծերուկ հայր Օհան: Հայր սուրբն ընդունեց բանալիները, հարցնելով: Հայր Սուրբ, եթե մարդը հավատացյալդ չէ, Որտեղ պիտի նա իր մեղքը խոստովանի: -Սրբազան հայր, մենք քրիստոնյա ենք,- նկատեց մի վարդապետ,- որտեղ և օծենք մեր քահանայապետին, միևնույն է: Հայր Կոմիտաս, աչքով չտամ, բավականին կազդուրվել էս, հանգստացած տեսք ունես, երևի լավ են պահել քեզ այս մի քանի ամսվա ընթացքում, խոսակցությունն սկսեց վեհափառ հայրապետը* և այլն

Հայր հասկացույթը հանդիպում է նաև «Խնամող, կրթություն տվող անձ: Հոգևոր հայր» իմաստով, ինչպես՝ *Հայր չունի, դու եղիր նրան հայր: Ազգակցական հարաբերություններ ցույց տվող հասկացություններից «խնամող» իմաստով առանձնանում է քույր հասկացույթը (գրության քույր):*

Հայր հասկացույթը իմաստի ընդլայնմամբ զբաղադրում նշանակում էր նաև «նախահայր», որ վերագրվում էր Մամուել, Նախաստեղծ, Աբրահամ անձնանիշ գոյականներին, ինչպես՝ «Մամուել **հայր** Ասորւոց», «Նա զնախաստեղծն **զհայրն աշխարհի**», «**Հայր** մեր Աբրահամ է» և այլն: Այս իմաստով գործածվելիս հասկացույթը գործածվում է նաև որպես օրենք հասկացույթի հատկացուցիչ, օրինակ՝ «Ի վերայ հարցն օրինաց», «Անցանել զհարցն օրինօք» և այլն:

Լինելով անձնանիշ հասկացույթ՝ **հայրը** կիրառվում է և՛ եզակի, և՛ հոգնակի թվով՝ ի տարբերություն առաջին իմաստի, օրինակ՝ «Ով հարք սուրբք»: Է. Աղայանը, անդրադառնալով այս իմաստին, նշում է, որ այս իմաստն է ենթադրում նաև **հայր** հասկացույթի հոգնակի ձևը՝ «հայրեր, նախնիներ, նախորդ սերունդներ» (1, 813) և «*հայրեր, պատվավոր, նշանավոր այրեր*» իմաստներով: Ըստ Ս. Մալխասյանցի՝ **հայր**

հասկացության հոգնակին ենթադրում է «նախնիք, պապեր, նախապապեր» (10, 39) իմաստը, ինչպես՝ *Քեֆ էին անում ու ուրախանում մեր հսկա պապերն ու մեր հայրերը*:

Ինչպես ժողովրդախոսակցական լեզվում, այնպես էլ աշխարհիկ բովանդակությամբ գեղարվեստական գործերի մեջ **հայր** հասկացությամբ նշանակում է նաև «*ցեղի կամ ազգի նախահայր, վերակացու, տնօրէն, գլուխ, տեր, առաջնորդ*» (12, 32), ինչպես՝ *Մեր ազգի հայրն է Հայկ Նահապետը՝ ըստ ժողովրդական աւանդութեան, Մայրս, քույրս միտս ընկան, որ հայրերիս սուրբ հողում ինձ կհիշեն ու լուռ կուլան աստղերի հետ հեզ և այլն*:

Հայր հասկացության հոգնակի թվով կիրառման ևս մեկ իմաստ են բերում ՆՀԲ-ի հեղինակները՝ վկայելով, որ **հայր** հասկացությամբ ասորերենի նմանությամբ կիրառվում է նաև ծնող իմաստով «Ըստ ասորի ոճոյ՝ փոխանակ ասելոյ հայրն և մայրն, ծնողք», ինչպես՝ *Կայեն ծնաւ անիծիւք, զոր զգեցեալ էին հայրք նորա, Օր մի երբեմն ղի ոչ ղիտէին հայրք նոցա, ասէ Կայեն զՀաբել, եկ երթամք ի դաշտ, զԱդամ և զնոյ զհարսս ամենայն երկրի և այլն*: Օրինակներից պարզ է դառնում, որ իմաստային այս կիրառությունը հատուկ է հոգնակի թվով արտահայտություններին:

Այս ենթաիմաստի ընդլայնմամբ **հայր** հասկացության կիրառությունը նշանակում է նաև սկեսրայր և մայր հասկացությամբ՝ սկեսուր, ինչպես՝ «Արդ նոքա են քո **հայր** և մայր»:

Արշակունյաց Հայաստանում այս հասկացությամբ էր բնութագրվում «Արշակունի թագավորների արքունի **ներքինապետը, մարդպետ**» (10, 40), ինչպես՝ *Արտաշէսյանները նրանց հայր էին անվանում, որովհետև Մարդպետների աղիւր նվաճել էր արքունիքի հանդեպ հայրական հոգատարություն տածելու մենաշնորհը և այլն*:

3. Կենդանանշություն

Անձնանիշ-կենդանանիշ փոխակերպման արդյունքում կենդանիների անունների վրա դրվելով՝ կազմում է նրանց արականը, ինչպես՝ **Հայր** արագիլը կանգնել էր բույնի եզրին, հսկում էր նորածին ձագերին, իսկ մայր արագիլը գնացել էր ճահիճը կերակրվելու կամ կեր բերելու: Մի առավոտ **հայր** արագիլը իր ձագերի գլուխն անցած պտույտ գործեց գյուղի վրա և իջավ բակը: Օտարը, որ չէր սպասում այդպիսի հարձակման, պաշտպանվում էր կատաղորեն և կարողացավ դուրս պրծնել **հայր** առյուծի թաթերից, ետ ցատկել և թափ առնելով հարձակվել: -Ժամանակն է, շուտով պետք է հեռանանք այս տեղերից, -ասում էր **հայր** արագիլն իր ձագերին: և այլն:

4. Իրանիշություն

Հայր հասկացությամբ՝ որպես իրանիշ գոյական, «առաջին յիմիք կարգի» իմաստով գործածում է Եղիշեն «Ամենայն տառից առաջին և **հայր** այրն է» (12, 32) նախադասության մեջ՝ առարկայացում գեղարվեստական պատկերավորման միջոցով:

Հայր հասկացությո՞ւմ է բնութագրվում Ավետարանը, ինչպես՝ «Քանզի **հայր** մեր զսուրբ աւետարանն գիտեմք, և մայր զառաքելական եկեղեցի կաթողիկէ»:

«Սկիզբ» նշանակությամբ Է. Աղայանը բերում է «գիտության կամ տեխնիկայի որևէ ճյուղի հիմնադիր» (1, 813) իմաստը, ինչպես՝ *Հերոդոտոսը հայր է կոչվում, Հայ պատմագրության հայրն է Մովսես Խորենացին*: Այս իմաստին Ս. Մալխասյանցը հավելում է «սկզբնապատճառ, հեղինակ» (10, 39) փոխաբերական իմաստը: Այս իմաստի դրսևորումները նույնպես բավականին տարածված են հայ հին և միջնադարյան գրականության էջերում, օրինակ՝ Գրիգոր Լուսավորչի «Հաճախապատում» երկում հանդիպում ենք «Մահվան **հայրը** նախանձն է» նախադստությանը, ինչպես՝ «Ով է **հայր** մահու,- Նախանձ» (6, 147): **Հայր** հասկացությո՞ւր վերոնշյալ նշանակությամբ է գործածվել նաև Հայոց հին հավատալիքներում (9), որտեղ ավանդադրույցները ներկայացվում են ընտանեկան հարաբերությունների ձևով: Այս դեպքում **հայր** հասկացությո՞ւն անմիջականորեն առնչվում է **մայր** հասկացությո՞ւն և բնության երևույթների անձնավորմամբ ներկայացնում ընտանեկան հարաբերությունները, ինչպես՝ *Երկինքն ու երկիրը ամուսիններ են: Երկինքը **հայր** է, երկիրը՝ մայր*: (9, 12): Երբեմն **հայր** հասկացությո՞ւր դառնում է որոշիչ, ինչպես՝ *Ամպրոպի ժամանակ **հայր** երկինքն ու մայր երկիրը ծիրանի ծովի միջոցով միանում են իրար* (9, 21) և այլն:

Իրանիշ գոյականների վերագրվելիս **հայր** հասկացությո՞ւր նշանակում է նաև նախանյութ, ինչպես՝ «Պողպատի կտոր, որի վրա բարձր քանդակված է տառը, և որից ճնշման միջոցով ստանում են մայրը և մատրիցան» (10, 40):

Գրականություն

1. Աղայան Է., Արդի հայերենի բացատրական բառարան, Երևան, 1976, «Հայաստան» հրատարակչություն:
2. Աճառյան Հ., Հայերեն արմատական բառարան, հ. 3, Երևան, 1971, «Երևանի համալսարանի» հրատարակչություն:
3. Դեմիրճյան Դ., Երկեր, Երևան, 1983, «Լույս» հրատարակչություն:
4. Զոհրապ Գ. Երկեր, Երևան 1989, «Խորհրդային գրող» հրատարակչություն:
5. Թումանյան Հ., Երկերի լիակատար ժողովածու, հ 2:
6. Լուսավորիչ Գ., Հաճախապատում:
7. Կողբացի Ե., Եղծ աղանդոց:
8. Հայոց հին և միջնադարյան բանաստեղծության քրեստոմատիա, Երևան, 1979, «Երևանի

- համալսարանի» հրատարակչություն
9. Հարությունյան Ս., Հայ հին վիպաշխարհը, «Արևիկ» հրատարակչություն, Երևան, 2004:
 10. Մալխասեանց Ս., Հայերէն բացատրական բառարան, հ. 1, Երևան, 1944, Հայկական ՍՍՌ պետական հրատարակչութիւն:
 11. Նար-Դոս, Պատմվածքներ, վիպակներ, Երևան, 1978, «Լույս» հրատարակչություն:
 12. Նոր բառգիրք հայկազեան լեզուի, հ. 2, Երևան, 1979, «Երևանի համալսարանի» հրատարակչություն:
 13. Շիրազ Հ., Երկեր, հ. 4, Երևան 1986, «Սովետական գրող» հրատարակչություն:
 14. Շիրվանզադե Ալ., հ 3, Երևան, 1987, «Սովետական գրող» հրատարակչություն:
 15. Սևակ Պ., Անլռելի զանգակատուն, Երևան, 1990, «Խորհրդային գրող» հրատարակչություն:

Գեղարվեստական օրինակների մի մասը ներկայացված է՝ ըստ Արևելահայերենի ազգային կորպուսի
http://eanc.net/EANC/search/?interface_language=am: Հասանելի է 20.10.2019:

Հոդվածը տպագրության է երաշխավորել ԱրՊՀ գրականության և ժուռնալիստիկայի ամբիոնը: